




# Emmanuera

Te Atua i buakora

## K a n o a n a

<i>Te Kamauri</i>	1
<i>Kaongora man NSC</i>	2
<i>Kangora mai iroumi.</i>	3
<i>Te Reirei</i>	6
<i>Ana Tangira Te Uea</i>	6
<i>Te Karaki</i>	10
<i>Te Maeu ae Tabu</i>	12

## Te Kamauri



*“E weteira te Uea n te tai aio ni makan Mangautina nakon te kabouaki .....”*

**“E a uti Kristo Alleluia, Alleluia!** Bon Aio te Bong ae E karaoia te Uea, Ti na bane ni kimateirei mani kakatonga inanona.” (Taramo 117,24).

Ti reiti banara ma banaia kain aonaba n neboa te Uea n ana tokanikai Iesu man te mate are E a kauka iai nakoira ngaira ni kabane te kawai nakon te Maiu inanon te Mimitong ae akea tokina ma Ngaia i Karawa.

Tera tibangara mairoun te Uea inanon Bakate aio? I taku ba te bai ae kakawaki ba ti riai n namakina te kamaiuaki ni kouaua mani mamarara, ao ara kanganga ma rawawata aika a tia n taotaonira. E weteira te Uea n te tai aio ni makan Mangautina nakon te kabouaki n te aro are ti na kitana iai aomatara ni kawai are toronaki n te bure ma te mate ao mani katoka iaora aomatara aika

boou ae katotongan Iesu. Ti bia riki ba taan uouta kakoauan Otan te Mangauti nakoia tarira ma manera nako, riki ake a raroa nako ma ana Tangira ao ana Nanoanga Atiniban Iesu. Ti bia uouota banan te anera are e tuangia Maria Matarena ao Ioanna ma Maria are tinan Iakobo ni kangai, “E aera ngkai kam ukoukora Iesu ae Maiu ibuakoia aika a mate? Akea ikai ba E a uti”. Ti na kaota raneanan ao mimitongin te Mangauti nakoia aomata ni kabane n ara makuri aika raroai ao n ara tokanikai inanon te Uea.

Ti na reitaki ma kiritian ni kabane i aonaba n neboa te Atua n Ana Nanoanga ae akea tiana ma tokina, riki inanon te Toa ae Ana Nanoanga te Atua are baka n te Tabati 11 April, 2010.

Bon ana katekeraoi Emmanuera nakoimi ni kabane tarira ma manera ni charismatic inanon tain te Bakate aio ao ara tataro ba ti na anganaki te teimatoa ao te kakaonimaki nakon tabera aika e a tia ni muiokoiria iai te Uea inanon ara botaki ni charismatic ao n ana Karea ake E a tia n anganira.



Ti a reitaki naba n te tai aio inanon te Tataro are E otoia man anaia Tamara te Bobe, Benetito XVI n tokin ana kabarabara inanon ana Tutia n te Tabati ni Bakate ae nako:

“Ni korakoran ao makam Iesu ae te managuti, ti reitaki ni buakana te roo ma te buakaka n te aonaba. Iesu ti kakoaua ba bon ti ngkoe korakorara n taai nako, riki ngkai Ko a tia n

Kiribati Catholic Charismatic Renewal Service

Ibukin am rongorong, taiaaaka reitaki ma Uriam Timiti, Fulitua Taraora, Beneteta Raobati ao Kautoa Tonganibeia.

Phone: + 679 3385364  
E-mail: timiti\_u@usp.ac.fj;  
f\_taraora@hotmail.com  
bene\_raobati@yahoo.com.au  
kautoat@yahoo.com

[www.kccrs.org.ki](http://www.kccrs.org.ki)

Ana website te Karetimatiki ibukiia kaain Kiribati. “Nakomai te Tamnei ae Raoiroi kaon nanoia taan animaki.....”



*“A taku aomata ba a  
mino kain te  
charismatic ibukina ba  
aki kona n nora te bai  
ae ti noria.....”*

tokanikai iaon ana makuri ni kabane te ri-  
aboro ao ni kataea ana kai te mate.

Ti butiko te Uea ba Ko na anganira te tokani-  
kai iaon taian itabarara ma kairiribai inanon  
ara utu, ara kawa, botaki n Aaro ao te Tau-  
taeka; te korakora inanon taian mamara; te  
kamaiuaki man taian aoraki; te kainaomataki  
irouia kain te uma-ni-kakain ma ake a tauto-  
ronaki, ao te raoi nakoia aomata nako. Amen

## Kaongora man NSC

**RANEANEAN TE REREUA N**

**22/01/2010 – 24/01/2010**

### **TE Kanimabong**

E moanaki man te tutia ae karaoaki n te  
bakantaai ao are e a kababaraki iai  
rongorongon taian karea iroun te tama Koru  
inanon ana tai ni kababarara.

### **TE Kaonobong**

#### **Kanoan te maroro- Fr Koru Tito**

##### **1. Kanganga aika a riki n te aonnaba**

Legalisation of Abortion – USA, A kariaia  
tiringaia ataei n te aonnaba,

I Nutiran ao 15,000 ataei aika a kabakaki ao  
tiaki ti ngaia a manga kabooaki taokita ake a  
karaoa aei. Iai ana tua ni maroro iaon te  
katokan te child abuse are ko na kabureaki  
iai ngkana ko oroia ataei ma e kaitara ma aia  
tua naba aaba aikai ae kabakakia ataei.

Haiti – bon te mainging n te aba ae  
karika te mate ae rawata

Oin te maroro bon te kantaninga are ngkana  
iai aika a tokanikai bon iai naba aika a kona-  
aki ao n ana kabotau ai aron Tawita are e  
tokanikai n te buaka ma e nanokawaki ba a  
mate Tauro ma natina ae bon tiaki taan  
mate.

##### **2. Te maroro iaon ana karea te Tamnei ae Raioiroi**

A taku aomata ba a mino kain te charismatic  
ibukina ba aki kona n nora te bai ae ti noria.  
Karea mai iroun te Tamnei ae Raioiroi bon  
bwai aika a katika aonteaba nakon Te Uea ao  
a reke bon ti ibukin te Ekaretia.

Taran taian karea ma aron kabonganakia  
irouia kain te charismatic kanga ai bon arora  
Ngaira (kain te charismatic) ae ti riki ba  
kanga ai aron te kita (guitar) ao te Tamnei ae  
Raioiroi bon Ngaia are E katangtang ao ao-  
mata ake a ongora, bon kabotauaia aomata

ake a butimaea kabonganana te karea, tao n  
aekan te aoraki.

Tiaki te bai ni kabobai ana karea te Tamnei ae  
Raioiroi n ana maroro te Tama, e bon karakina  
aron Timon (tia tabunea) ngke e bubuti nakon  
Betero bwa e na kabooa te karea. E bon aki  
kakaboaki te karea.

Ma tai kamaningakoko ni baibaia n ana karea Te  
Tamnei ae Raioiroi, ti na bubuti te karea ao  
ngkana iai iroum ao teimatoa ni bubuti riki na-  
kon Te Uea ba e na teimatoa iroum ao ni kabon-  
ganaki raioi. E taku naba te Tama ba ngkana iai  
te karea iroum ao e rawawata riki am bure ba  
ko na riari ni makuri maaka riki nakoia aomata  
ake akea aia karea.

Iai taian karea aika akea n te baibara n aron te  
tang, te roko n nano ke karea n namakin.  
Kanga ai aron te tangira imarenan te mane ao  
te aine ae roko nanom iai ao ai bon aron naba  
am namakin n te moan reitaki ma Te Uea.  
Ngkana e kerikaaki te namakin anne ao ti na  
tauraoi n reitia ma nanora ni koaua n ai aroia  
tanga aika a reita aia tangira n akea te na-  
makin.

##### **2. Te kauoua ni makoro ni maroro:**

Te nati ae bakatae bon te kabotau are e an-  
ganira te Tama ba ti na tauraoi n tibaa te raioiroi  
nakoia tarira ao manera ao ti na aki kairiribai.  
Oin te kantaninga ti na iangoi rokoia aomata  
nako i karawa, anga nnem I Karawa nakon te-  
manna. Kabanea korakorom ni bubuti ibukia  
aomata nako ba a na roko i karawa.

Te karea ao te maiu ae tabu bon baai aika a  
kaokoro. N aron ae te karea e kona n anganaki  
te aomata ae e tuai mareaki ae tiaki kain te  
maiu ae tabu. Ma iai bukin baai ni kabane iroun  
Te Uea ao ti na aki katangi nanora iai. Ti na  
katiteuanaki. Karea ni kabane a boto man te  
karea ae ti teuana ae TE TANGIRA. Ngkana  
akea te tangira ao bon akea manenan te karea  
ngkai bon te Atua bon te Tangira. Ngaira ni  
kabane, aio te karea ae bane ni iai iroua ma ti  
na rabakau ni kabongana raioi te karea anne  
ngkai e toa te aomata iai. Ti na rabakau n ti-  
baia nakoia aomata nako, kain ara makoro, kain  
rarikira ao ai kain ara utu.

##### **Te Tabati**

Te nebonebo ae e karaoaki n te aoa 5:00 am ao  
ai te katauraoi nakon te Tutia are kairaki irouia  
kain te charismatic.

##### **Te Tutia**

The Joy of the Lord is my strength – Kimareirein  
Te Uea bon korakorau, anne bon ana taeka te

tama ae taekinna ibuakon ana kabwarabwara n te bong anne. N reitaki naba ma aron ae ti nang riai ni kakarekea ara tai ni wawareka ana taeka Te Uea are n te Baibara ni katoa bong. E maiu ana taeka Te Uea ao iai uaana are e kairira iai te Tama nakon taian kibu aikai:

Ebeto 5: 26

Ioane 15: 3

Roma 10: 17

Ebera 4: 12 – E bwenaua te iango ma te nano te kabang ae uaai wiina

Mataio 4: 4 – Ti kamarakeaki iai

Nemia 8: 10 – Ti anganaki te korakora

2 Bauro nakon Timoteo – Ko anganaki am bwai ni makuri ibukin te raoiroi

Ni baran te tutia ao ai te tataro ni kakorakora nakon te Tama Koru ao te kainaomata irouia tarira ao manera. Bon itiman botai tarira ao manera ake ti reita nanora ma ngaiia n aia bubuti nakon Te Uea n te tai aio. **E RABA TE UEA.**

### 3. Kanoan te maneaba:

Te reitaki n te aiabu n te kanoa n raurau ao Tamara ae rine e katauraokai ana kanoa n raurau irouia tarira ma manera aika kain Teaoraereke Parish. Ara irua bon Tamara ae Fr Koru ao ai tarira ma manera ake a kainao-mataki n te tai aei.

Bon iai maroro ake a nako man te NSC, riki iaon ana aknganga te NSC ibukin ana mane ao kainnanaoan te biri mane. E a manga reitaki iroun Tamara man motikia ba e na moanaki te waaki n karemangko are kabonganana ana karea te Tamnei ae Raoiroi n onea mwin te biri iaon temanna are \$2.00. E moti ba e na iai aia tutia kain te charismatic ni moa man te Tabati ae 31/01/2010 i Bikenibeu ao e na waaki inanon Tabati ake imwina n tabo ake a na motikaki man te tai n tutia anne ba e na boo ia. Te tutia are e motikaki e na boo n te aoa 5:00 n te bakantaai n Tabati aika 31/1/2010, 7/02/2010, ao 21/02/2010 ao e na irianaki ma te karemangko ba e nang kamakuraki ana karea te Tamnei ae Raoiroi n onea mwin te karikirake.

### E mamakuri te Tamnei ae Raoiroi

E a bara te botaki ma te nano e bon aki toki ba are ai te bane ni kukurei n aron mamakurin te Tamnei ae Raoiroi inanora ni kabane.

## Kaongora mai iroumi

### IAWE e teimatoa Am taeka n aki toki i Karawa (Taramo 119 12:89)

*Moarete Teiti, Santa Maria Charismatic Renewal, Bikenibeu Parish.*

Kam na bane ni mauri n ana Tangira ma ana Akoi ara Uea ae Iesu Kristo.



N te tai aei, ao ti bon bane ni kakoaua ba ti a bon roko ni wikin te karemo, ma ngaia are ti na bane ni kekeiaki n tataro ma ni kakorakoraira ni bubutia Uean te Maiu ba E na raonira iroun Tamneina ae Raoiroi.

Ma e raba Uean te Maiu ngkai e angania kain ara botaki ae Santa Maria Charismatic Renewal (SMCR) man St Ioteba Parish, te ingainga n nano ma te kekeiaki ni karaoi tibangaia n aron weteara iroun aia Uea.

Ni katoa te moani Kanimabong koraki ao ai bon ara tai ni kaea Nantes ibukin te weekend ma te Uea. E moanaki ma te tutia n 6:00pm ao imwina ai te nebonebo ao ai manga te uatei n tantani imatan te Eukari n reitakinako ma te "time out" irouia kain te charismatic.



Te Kaonobong n te aoa 6:00am ao bon tain kaotinakoan te Eukari ao te tantani ao 7:00am manga tain te tutia. E bon wakinako ma te nebonebo imwina ao ai te Kanimabong. Ma kona taku ba tera te kaingabong n te tai anne? Bon te kabuki kariki ao karuoana te ran / karau. Bon anne are ai kakoroan nanon aia baire ibukin aia moani Kanimabong koraki ma te Uea. E bon reiti nako kanoana ma te reirei iroun Fr Patrick, imuina bon te Bau n nanoanga, kawain te kaibangaki ao ai taian tibatiba. Ma ai bon te karabaraba riki nakon Fr Patrick ibukin ana botumwaaka ni katauraoa ana anga reirei ribuakon tabena aika a maiti. Ti kaitaua nanona n taningamarauna n raoniira inanon ara weekend koraki.

### Te Tabati

N te Tabati ao ai bon tain te tutia, are a taorimiaki ma te nebonebo, te kainaomata ngkana




*“Ma ai bon te karabaraba riki nakon Fr Patrick ibukin ana botumwaaka ni katauraoa ....”*



*“Reireinia n tou mwin  
baai ni kabane aika I a  
tia n tuangi ngkami....”*

e angaraoi. Kanoan te maneaba n aron te amarake, te uouo man taian group nako. Ti bane ni bara nako imain te tutia n te aoa 5:00pm.

Ma tera nanon Te Uea n te tai aei? E koaua, e bon tuai n toki nanon Te Uea ni kainnanao karokoan ao nikiran Ana Tangira irouia tarira ma manera aika a bora n taka. Ao e taku ana taeka n reirei teuana:



“Reireinia n tou mwin baai ni kabane aika I a tia n tuangi ngkami. Ao noria ae I mena ibuakomi ni karokoa tokin aon-naba” (Mataio 28:20 Mareko 16:15) ao ti bon bane ni kakoaua ba ngaia

e maiu Te Uea n Ana Taeka. Ba n te Kanimabong 12/02/2010 ao a kaea nangin Nabeina te tiibi leader ma raona ao ni karairaki ni bakantain te Tabati. Oin te mananga ba kaekan aia rongorongo mitinare ibukin tangiran kamaeuan te charismatic n aia kawa. N rokoia ao a karaoa te anga-reirei, te mananga nako an mwenga, bau n nanoanga, te kawai ni kaibangaki ma iriana te Novena ao ai te nebonebo. Ko raba te mitinare Kirititoba ma kain am kawa. E na raoningkami Te Uea inanon te wiki ni karemo aei.

Ao ni manga te weekend are imwina 19/02/2010 ao ai manga kaeon te kawa ae Tabiteuea ibukin manga uotan ana Tangira Te Uea. Inanon te waaki ao bon aman (4) ana aomata ake a reke aia tai ni kainaomataki. Kanoan te waki bon ti te arona n aron te anga-reirei, kawarakin mwenga, bau n nanoanga, te kawai ni kaibangaki, te Novena ao ai te nebonebo. E kairaki te aba ni bakantain te Tabati.

Ti bon karaba Uean te Maiu n aron te korakora irouia kain te botaki ni charismatic ae banin i aonnaba, ba ngke arona ba akea te boutoka n te tataro, ao e bon aki kona n riki aei, ke ni koro bukin bai ni kabane ma ti karabai ami tataro ao ana buoka te Uea.

Ti kaitaua ara mitinare ae Tabera Burantiti are e a tia n anga ngaia n te tai aei ba e na karaoa ana kabanea ni kona ibukin ana botaki ae Santa Maria Charismatic Renewal n ana Parish ae St Ioteba.

## Aia berita Taari i Wainadoi

*Nei Maati Kanimea, St Padre Pio Suva.*

Ti kamoamoā ngaira kaain St Padre Pio ngke e reke ara tai ni ira aia berita ara Tari aika kain te MSC n aia tabo ni kataneiai are i Wainadoi.

Nte bong ae –Tianuare 2010 ao ti a bane ni botaki n ara tiente are 7 Lavena Road, Nabua are bon mwengan Uriam ao Atuna ma n te tai aio e a manga mwenganna ara riita ae Ian ao Maryanne riki ngkai akea Uriam ma natina ba a okira Tarawa ni motirawa. E tauraoi baora te b’ati tewana are e biriakinna kain ara botaki ae Emily ma kain umana ae Mati Kanimea.

Ti a bane n tokara baora aio ma ara tianaki ae tabeua betin n oraora , tabeua betin ni bekei ao ai ara kaburoburo ni moa ma raona are tabeua betin n raiti. E bon ra on ara b’ati ba a irengan kaaina ma aia koraki Ian ao Maryanne ake a roko ni buoka te katauraoi ibukin boutokaan ana berita naan natia, tibuia tariia ao maneia are te Tari Tamoa. A karabaraba nanora ibukin aron nanoia ara koraki ni boboutoka aron aia kekeiaki ma aia waaki ara mitinare. Kam raba ana utu te Tari Tamoa e bo atin ami katauraoi.

Raora iaon ara b’ati aio bon tangaia Ian ao Maryanne ma natia ao aia unaine ae Katoa. Iai naba tarina ae Ben ma ana utu, Kaneneia ma Desmond ao natia aika Ata ao Delly. Nei Iotita ma natina mai New Town, natin Karekeiti ao ara mata n aine ae nei Kaiewenako are bon raora naba. A raraba naba tangaia Itintaake ma nei Koin ao natiia, Mati ao Namena ma natia, Emily ae manen Namena ma natina ao ai tangaia ara baatua aika Tekaieti ma Nei Kare ao tibuia.

Iai raoara ake a aki kaoti ba a tabe ma a bon boutoka naba buokara ibukin ara katauraoi riki ni kanoan nako ara betin. Ti ataia ba bon raonira n tataro ibukiiia ara tari aika a bou ao man tauraoi ni manga anga nanoia n iriira Iesu. Ti kaitaua naba.

E moanaki te Tutia ni berita teutana imuin rokon ara b’ati ao ti karaba te Uea ba ti reitiia ara Tari aika Br.Tamoa, Br Tebaai, ao Br Beniati ni kabureia nakon te maeu ma ara Uea ae Iesu Kristo.

Ti reita aia anene kaain te Tutia ao man anga riki ngaira ma ara Tari aika a boou nakoina n aia anene are e aneneaki n tain te Komunio- Here I am Lord Is it I Lord I have heard you calling.....



**Ribooti man Charismatic Teoraereke Parish (Beberuare nakon April). Rongorongong aika a raka**

*Aritita Tekaieti, Teoraereke Parish.*

E waaki ngkai ara charismatic ma kaaina aika mai Bairiki ma aia leader ae boou. E tuai man reke ngkai kain ara botaki mai Nanikai. Iai te teimatoa ni marurung ae noraki irouia kaaina mai Teoraereke, - Natari, Tetaobe (roronirikirake ma group n ataei), Abaunamou, ao Ierutarem. Iai naba te kakamakuri mai Banraeaba ao e a tia ni manga uti ao a raraba tarira ma manera mai Ambo group ba a ibuobuoki ma raoia te tiibi leader ao ai te Tama Koru are e a kaotai nanoia tarira ma



manera mai Banraeaba ao ni manga wa-akina te kekei-aki ni marurung. Mai Ambo ngkanne e a tabe naba ni rikirake kaa-

ina ao a marurung ni kabane.

Ti na karaba Te Uea n te korakora ae anganganira ngaira kain te charismatic mai Teoraereke Parish inanon te tai teuana ma teuana ni waaki ni kakaea kamarurungaia tarira ma manera ao ni bobotaki ni kaunga.

**Ribooti man Charismatic Betio**

*Riwata Obetaia, Betio Parish.*

Bon iai te maiu ae e a tia ni manga reke imwin te rereitaki n tataro ma taria ao manera ni parish ake uoua (Teoraereke, ao Bikenibeu) n te iwawaki n nebonebo n te bakantaai koraki n Tabati are e kairiria Tama Koru ma te NSC. Iai manga kawarakin mwenga n tataro n akawa ao ni manga kabouaki iai maiuia kain kurubu ao ni manga kaoti iai naba tariia ao maneia aika a boou.


I Temakin ao e bon teimatoa aia rereitaki imwin tutia koraki n te Katenibong ao iai aia waki ni kamarurung ni mwenga n tataro ma aoraki. I Takorongong, ao ai bon arona naba, ma bon iai teutana te mamara ni kurubu tabeua n noran uareuken maitin kaiia, ma e ngae n anne ao e bon waki nako naba aia rereitaki. N teuana kurubun Takorongong ao a

tabe n ririkirake ngkai maitin kain, ike a manga kaoti iai tabeman aika a boou. N ana tangira te Uea are a tia n tibaia kain te kurubu aio mai Takorongong ao e oti ba e korakora ake a tia ni kawarii n aia auti n te makoro ae Tirotaam teeti ake a manga rairi nanoia mani kani kaaki aia bai ni bekan (riaboro).



A taekinna riita man te kurubu aio, ba a t a n g i r a k a w a r a k i a koraki aikai n anaaki aia bai ni bekan mani k a n a k o a k i man aia auti, ao man tauraoi n ira te tataro n Charismatic. A tauraoi ngkai niman (5) tarira ao manera aika a boou kain te kurubu aio ni moana aia kooti n te Maiu ae Onraken te Maiu (15 ni miniti). A iangoia ba ana moana aia koti aio n taketena te Toa ae Bentokota ba ana kainaomata iai.

E bon teimatoa kawarakiia bure ao aoraki n te onnaoraki i Temanoku, ao aia rereitaki n te Tabati koraki imwin te Tutia. A tia naba ni bowi ni bairea aia katauraoi aia tani maninga kain te botaki ni Charismatic mai Betio ake a na nako Kuria n aron baireakina n te NSC ma te Fr Micheal. Maitia aia tani mananga bon 6 ao a wakina ngkai aia karekemane ibukin buokan kantokaia aia koraki aikai are e katautauaki aia tai ni mananga inanon wiki rake aikai imwin te toa ae Bakate imwin tian aia rereua are e na karaoaki ma Fr Micheal. A tauraoi naba ni butimai anganano mairouia tariia ao maneia ake a kan anga aia ibuobuoki ibukin buokan kakoroakin kantokaia nako Kuria. Ibukin tabetabeia riita n taai aika a nako ao e a bon aki rangin rereke aia tai ni bobowi n riita kain Betio, ma e bon teimatoa te marurung irouia riita ao a bon wawaki ni kakaraoi aia rereitaki n kurubu n te Katenibong koraki.



*“A tauraoi ngkai niman (5) tarira ao manera aika a boou kain te kurubu aio ni moana aia kooti n te Maiu ae Onraken te Maiu “*



## Te Reirei

### Te Kabouaki Inanon te Uea

*Uriam Timiti, St Padre Pio Suva.*

Ti tangiri riki baika boou nakoni bai aika a bai ni kawai aika a mane. Bon nanon te Uea ba e na boou ma ni mamaiu n tai nako ara tangira ao ara onimaki. A maiti Kritian aika a babaina te taeka ae kangai: "I mamara ao tabeman a atoatonga kanga te bai are a kamoamo iai. Inanon te Bakate aio ao imuin tokanikaini Iesu man te bure ao te mate, E weteira te Uea nakon te kabouaki n ara onimaki ao ara tangira Nakoina. E taku Iesu: "Noria, I a manga oniki bai ni bane ba baika aika boou." (kaotioti 21 : 5)

Tao e rangi ni bati te bai ae riai n onikaki ba te bai ae boou ma maium, ao ko aki kona n onikia ngkoe n oin am kekeiaki. Ma e boni kona Iesu, ao nanona E boni kani buokiko iai.

E roko Iesu ba E na anga te Tamnei ae Raoiroi nakoia aomata. I nanon taian Euangkerio ao e kaotioti taekan Iesu Ioane te tia Babetito ni kangai: " E na babetitoi ngkami n te Tamnei ae Raoiroi" (Ioane 14 : 12-13 + 16-17)

E kangai Iesu i main waerakena nako Karawa: "Kam a tia ni maeka i nanora ma e ti totoki ana makuri n ara bure, ae E kona ni manga karikira ba " Aomata aika boou ".

Buokara ibukin karekean te kabouaki bon karikirakean te maiu n tataro. Te bai are moan te kakawaki n am tai tataro bon te onimaki ae animakinan Iesu ba E mena iroum. Ngkai ti tataro ao E a kam tauraai ni butimaira Iesu. Ngkana ti atong manewen ara tataro ao E boni kakauongo n ongora ioura. Ngkana ti wareka ana Taeka te Atua, ao ti na boni kakoaua ba boni Ngaia are E taetae nakoira i nanon te wareboki are ti warekia.



Bon te Tamnei ae Raoiroi ae E na buokira n ara tai n tataro. Ti kona ni kabotaua ara waki aei ma te borau n te wa, ba ngkana iai te ang ao e raoiroi ngkanne te mananga. Ao ai arora naba n ara tai n tataro ba n ai aron te ang ae kabuta te wa ni borau n te Tamnei ae Raoiroi ae E kairira n ara tai n tataro.

Ngkana e aki bo n te ang wam ao ena bon aki buti – ao ai arora naba n ara tai n tataro, ba ngkana e aki buokira te Tamnei ae Raoiroi, ao ti aki kona n tataro.

Ti na bon riai n ataia, ba ngkana ti motinnano ba ti na kakawara te Uea ni katoa bong , ao ti na boni kakaraoia i bukina ba ti bon tangiria. Ti na kakaraoa ara tataro tiaki i bukin ungan nanora ni karaoia, ba ngkana arona anne, ao ti na manga katikua ngkana a aki unga nanora n te tai teuana. Ti kakaraoa ara tataro ibukina ba ti bon riai ni kakaraoia, ba boni baeia aomata nako, ba e kangai te moan Tua; "Ko na tangira te Uea ma nanom ni kabanea, tamneim ao korakoram ni kabanea, ao i aoni bai ni kabane."




Tao iai ioura aika a tia ni kaan n tai nako ma te Uea, ao E na boni buokia Iesu ni kaania riki ma Ngaia n te waki aei. Ao i bukia nake a rangi n raroa ma Ngaia ao e na boni katikia nakon Atinibanna ma ni karikiia ba aomata aika boou. Ma angin te aomata bon ti te mamara n tabetai ke tai nako, ma bon nanon te Uea ba a na ninikoria ma ni korakora tan iria.

## Ana Tangira Te Uea

### E kamaiura te Uea inanon te Botaki ni Charismatic

*Kaoti Teingoa Abaunamou Teoraereke*

Aio bon karakinan Ana Tangira Te Uea nakoia tangan Ueatu Teauti ma Tabeti Tekautu rinanon te botaki n tataro ae te charismatic iaon Abaunamou, Teoraereke. E bia reke te karaki aio ba te kaunga nano nakoia kain te charismatic ibukin te muioko ae kakawaki ae bon kabutaan ao karokoan ana Tangira, ana Nanoanga ao ana Kamaiu te Uea nakoia aomata nako.



N te ririki 2005 ao te tanga ae Ueatu Teauti ma Tabeti Tekautu, a kaoa te botaki n charismatic ibukin anakin baai n tabunea ake a

*"E na babetitoi  
ngkami n te Tamnei ae  
Raoiroi"*

nikiraki irouia ba bain ao katanan mwengaia ao bon ngaia naba, are a tiku n tabeaianga ao ni maku iai. N rokon te botaki n tataro ao a anai baikanne ao n urui ao a tiku ma te rau.

Tabewa te namakaina imuina ao e a taonaki neiere te aine n te aoraki ae te meira te rara n irianna n te maraki ao te aki kona n teirake. Iai ana taokita Tabeti ae te tia tobi ao n ana koaua ana taokita aio ba e a toki ana kona ma e riai ni kakaee buokana. N te taina inanon ana tai ni matu Tabeti ao e a kaututaki ao e a beroro tanninga are e weneakinna n te bana



are e kaututia ma e aki tabe iai ao e a bon matunako. Inanon matuna aio ao e a mi ba e tuangaki ba e na kawara Nei Ngaretin (are oti rongorongona n Emmanuera No:3) ba ngaia iai irouna te kabang ae itiai (7) wiina aika a kakang are e kaitiakaki

iai ana tekateka. N utin Tabeti ao e a kawara Ngaretin ao e a karakina miina nakoina ma e kaekaa Tabeti Nei Ngaretin ni kaotia ba akea irouna te kabang anne ba e mena n te Aro ni Katorika inanon te botaki ni charismatic (e taekina aio Ngaretin nakon Tabeti ibukina ba bon kamatu ngaia ni kauoman) ba bon ngaia naba are a tia ni buokia inanon aorakina ao ni kamarurungnga ao ni karekea bain kain te botaki ni charismatic. "Taraia Tabeti, N na weteia kain te botaki ni charismatic ba a na katokabai iaom ba ko a aonga ni marurung". N te tai anne ao a bon rereitaki kain Natari ma Abaunamou ni bon kamarurungia i bon irouia iaan are a karako kain Natari ba tao e aki ngaun.

N rokon te kurubu ni charismatic ni katokabai iroun Tabeti ao e a bon teirake naba ni marurung ao e bon kakoauaki irouia taan tataro baai (tamonio) tabeman ake a otinako mai irouna ao man okanako oon aia auti ae te kabaa ni karebwetaua.

Imuina n te ririki 2007 ao e a manga taonaki Ueatu ae bun Tabeti n te aeka ni maan teuana, ba e mwengabuaka ba ti tebo ma e a bon aomata te bai teuana irouna ae e a bon nanamakinna n tabetai ba ngkana ti ngaia n ana auti ao ti tebo ma iai te aomata irarikina, n tabetai e a bon namakinna ni bo rabatana ma ngaia ao ni kubanako. Iriana bon te mimi buaka ao te nibara n taainako, tao menan

baike a tia n uotaki nakon ana auti ao are bon kakoaua naba ba e a bon tia ni kabonganai rinanon taian makuri n tabunea. N rokora irouna ao I a bon maroro ma ngaia ao n tuangnga ba e na kaoti baai ni kabane ba ti na bane n angan te Uea.

N tain te nebonebo ao e anganaki manera ae Nei Taake Maenaima te taeka ae te tabunea are e a okioki i taningana ao n tain te katokabai ngkanne iaon Ueatu ao e a okioki i taningana taekan te mae. Imwin te tataro ao e a bo te tibatiba. E teirake Nei Taake Maenaima ao e taku "Iai te bai ae karaba te aoraki man aki taekinna nakoira". Ngke e ongo Ueatu taekan te mae ao e titirakina Nei Taake ni kangai ko kanga n ataia? E kaeka Taake ni kangai ba n tain te katokabai ao e a okioki taekan te mae. E kaeka Ueatu n taku, "Iai maeu ma I katekea n te rau ieta" ao e taratara nako, "Ao I bon kaotia raoi n te koaua ba te mae aei bon ngaia ngkoa korakorau ao makan au tabunea ba ngke I maenna ni kaea te interview ao I a bon reke naba iai. E korakora makana, a bane inanona te bunna n raoi, te mamauri n aekaia nako".

Imwin te katokabai anne ao e a bon anganaki Ueatu te mwengaraoi ao te rau ao a bane n nako baai ake a mena irouna n te moan tai. E raba Te Uea.

Ni manga n te ririki 2009 ao e a manga taonaki Ueatu n aorakin waena te angatai are e a bon kanaki nako mani maneka ba ai te buri ae onrake iai. A rawata ana taokita ao e a katokiia ao e a manga wetea te botaki ni charismatic. N tain ara katokabai irouna ao I bon kaira te tataro ao I kubanako ba maneu ae Nei Ngaretin (ai Nei Maria arana ngkai) e mena i matau ao inanon korakoran te ribano ni ianena ao e a bon butaki nako naba ma iaan baiu ao ni kaea te aoraki ao ni katoka baina iaon waena are e maneka. Imwin te nebonebo ao e a tibaia Nei Ngaretin ba e anganaki te tamnei (vision) ae nora te kai ae te burukam ae e kanaki nako ao n nangananga nako aana ao ngke e tara nanganangana arei ao e a norii kanoanimata aika uoua inanona ba kanoan matan te aine ao te mane ae e bon kinaia, ao e a bon taonna te tang ae korakora ba e a ataia ba bon te aoraki ao e a ti riaeaki naba n te bai ae buakaka. Tabewa te bong imwin te tataro ao e a karinaki Ueatu n te O n aoraki ao ana koaua ba e na babu waena ba e na koreaki. N rokon ana taokita ae tei Cuba ao e tuangia taian nurses Ueatu ni kangai



*".....ba ngaia iai  
irouna te kabang ae  
itiai (7) wiina irouna..."*





, “*Nakomai ba N na tana baim ba ko mananga mai karawa ni kawarai*”

“Tuanga ami taokita anne ba waeu aio bon au kainikoroboki” Ngke e ongo te taokita ao e taku nakon Ueatu “N na karaoa raoi am kainikoroboki ni katamaroa”. A maiti ana karian Ueatu i Nawerewere iai aika a uarereke ao a kababuaki waeia ao ngaia e maka koreakin waena ba ngkana e babu ao e a bon toki naba ana makuri ba are bon te driver ngaia. N tikun Ueatu i Nawerewere ao e reitinako ana reitaki ma te Uea. N te taina tao e a nukani-bong ao kanga e a rotia te baki ao e a tuanga buna ae Tabeti ba e nang kaotinakoao ao e kanakoa ba e na karekea kanana n te store. Ngke e nako Tabeti ni bobai ao ngaia e a tiku n tataro ao imwina e a matu naba. Inanon matuna ao e a ongo naba te bana ae kangai teirake ba ko na taua bain Iesu. Ngke e uti ao e kubanako ba e a tei naba irarikina te aomata temanna ao e kaeka ni kangai, ko rangi n aoraki ao ngaia e kaeka e ang I aoraki. E kina te aomata anne Ueatu ba e aki toki n roroko n te o n aoraki ba kanga iai irouna te burarei kanga e rangi ni mangori ibuakoia aomata, ao ngkana e maroro ma kain te on aoraki ao a aki kona ni butimaia raoi ibukin anuana are kanga e burarei.

N okin ngkanne Tabeti ao e a wetea naba te aomata arei n arana ae “Heaven” ao bon tiaki arana anne. Ngaia are ngke e ongo anne Ueatu ao e wetea te aomata arei ni katekateka irarikina ao n taua baina ma ni kangai, “Nakomai ba N na taua baim ba ko mananga mai karawa ni kawarai”. I a taekina miiu nakoina ao ngaia e kaekai man taku, “Ko ataia ae Iesu e aki kona ni kaoti nakoia aomata n rabatana ae kakannato ma e tangoi rabata aika a mangori man aki kan butimaeaki ao e oti anne inanon ana boki ae tabu ae te Baibara”.

N ana tai n tutuo Ueatu ni kakoauaki raoi ba tera raoi aorakina, (ao boni ngaia e ataia ba bon te tioka ngaia ni kakaiaki) ao e kamatoaki ae bon akea aorakina ao akea naba tiokana ngaia are e aki koreaki waena ni kababuaki. E raba Te Uea.



N otinakon Ueatu mai Nawerewere ao e a marurung ao e kanakoa banana nakon te botaki n tataro ba e na kakaongoaki tain te kurubu ba e a kaina te charismatic. Iai iroun

Ueatu te bai ae riribaia ba te tibatiba. Imwin rokon taian karea ake a anganaki tabeman ao a manga tibaia ma n te taina ao e ira te tataro ma te aoraki ae taniaki ao te bai are e riribaia ao e a reke irouna. E ongo nanon te ianena are e kauntaeka iai te tia tataro ma te riaboro, ao e noria riaboro ake iroun te aoraki ni karokoa kitanakin te aoraki irouia n otinako n touanako kawaia. E raba ana karea Ueatu ao ti na butia Te Uea ba e na kateimatoa irouna.

E korakora ana tangira Te Uea nakoia te tanga aio ao te bai ngkai ae riki e a reke irouia te rairannano ni koaua ao e a tia ni babetitoaki Nei Tabeti are bon te kamatu ni koaua ae iaon kawaina aia mare. E raba Te Uea te Uea n ana kamaiu nakoia ana botanaomata!

### **E Taetae te Uea Nakoira n te Mi-Ni-Buraeti** *Utimawa Bukaireiti, Temakin Betio parish*

Kam na mauri tariu ao maneu inanon ana tangira te Uea

Ngai bon temanna kain te Charismatic ae I a bon maan inanon te botaki ba man te ririki 1988. Man te tai anne man te tai anne ni karokoa I a okira Tarawa[2006- 2009]ba I aikoa makuri ao I aki toki n ongongo n tain te nebonebo ke botaki n maroro aia tibatiba tariu ao maneu. Te tibatiba anne bon te tamnei are a noria n tain te nebonebo. E aki teretere raoi irou te tamnei are e tibaki taekana ba ngaia bon te Mi-Ni-Burabeti. Ngkana I ongora aia tibatiba taan noo tamnei ao kanga I kakeweia. I titiraki inanou, ba a kanga n noora te tamnei ao ngai ma ngke I moa ni Charismatic I bon man n aki noora te kaoti ke te tamnein tain te nebonebo. Ai aroarou anne ae te noku ao te nano uoua ngkana e tibaki iroun tariu ke maneu temanna te tamnei are e nooria inanon tain te nebonebo. Bon te kananoanga ngai ni kateiu ae te noku ao te waeremwe ni kakoaua te baere e tibaki. I waeremwe naba ni butia Te Uea te karea are e reke irouia tariu ma maneu aikai ba N na anganaki naba te karea ae te konaa n noori tamnei n tain te nebonebo. Ngkana e tibaki te karea aei ao ngai I bon te kateka n rumarooa au karea ae te noku ao te nanououa.

### **Noran Te Tamnei**

Ngai ma tariu ao maneu n ara parish ae Betio, ti karaoa ara tantani n tairikin te kanimabong koraki imwiin kaotan te Eukari n te Kaotitaeka i Temakin. Ni ingabongin te Kaonobong imwin te



Tutia ao tia manga botaki n nebonebo. Ai bon aroarora anne n namakaina aika Nobemba-Ritemba 2009. N te ingabong teuana n te Kaonobong imwin naba te Tutia, ti a manga karaoa naba ara tataro n nebonebo. Te wiki aei a tia tiim ma kaaia ni kateaki. Tiim aikai bon te tiim n nakon te on-aoraki, te karabuuti ao te tiim ni kanako taimonio. Kanga iai te unga n nano irouia kain tiim aka a tiba rineaki kaaia ao e oti nanoia n noran ungan te nebonebo n te tai aei. I tekateka irarikia tariu aika Binataake ao Kautoa. Kautoa e a tiba rineaki ba te tia kaira te tiim ni kanako taimonio ao Binataake e a bon tiba kainaomataaki tabeua te namakaina n nako. Akea ba e a waaki te nebonebo ao inanon tain te nebonebo ai maia naba ngke I a noora te tamnei are bon te baere I nananououa iai ngkana e tibaki taekana. I nooria tariu aika a nukaai aika teuare Binataake mai angamaingiu ba e teirake ni kitana te nebonebo ao Kautoa e tei iaou man te angatai ao I nooria n tibatiba te raiti kanga inanon mangko nakoiria ngaira aike ti tekateka. E tiku n au iango te baere I nooria arei ma ngke e a bo tain te tibatiba ao I aki tibaia. I bon tabe moa ni miakinna ao ni iangoia ba bon te oi n tamnei ae kaotaki nakoia ke bon ti kanoan makurin au iango inanon tain te nebonebo. N te bong are imuina ae te Tabati ao ti a manga nebonebo imuin te Tutia i Temakin naba. E bon koro naba maitia kain te nebonebo n te tai aei ao iai namakinan te ang ae korakora ma ni kaunga. E waaki te nebonebo ae rebetaua ao ai ngaia ma aingaia ni karokoa ae e a toki n Ana taeka Te Uea are e warekaki iroun Kautoa are bon taekan kamaitan bwerena ake nimaua ma uoman te ika. Moan te kakaongora ao n riinga te nano taian tibatiba mani katekennano. Angiia tan tibatiba a karaba Te Uea ngkai E a bon anganira karara ke tibangara ake ti nang manga tibatibaia nakoia aoraki n te o-n-aoraki, buure n te karabuuti ao ai taan taniaki n te taimonio. Inanon ongorau n tekennano ma tibatiba ao uoman maneu a maneva naba aran Kautoa. Temanna e tibaia kanga te iango ae tuangaki ba iai taben Kautoa ae bongana ae nang wakinna. [I aki uringnga]. Maneu are temanna e tuangaki ba e na kauka ana taeka Te Atua ao e na angan Kautoa ba e na warekia ao e na bon karaoia. Ai ngaia are e a tibaia n tain te tibatiba. Ngai ngkanne I bon uringa naba te tamnei are I nooria ngkoananoa are bon tamneia tariu aika Binataake ao Kautoa. I bon

irou ao I ataia ba aio bon te oi n tamnei ao teoi n rongorongo ae I a riai ni kakoauaa ao man tibaia naba. E moa naba man te tai aei kakoauaan te tamnei are a nonoora tariu ma maneu n tain te nebonebo.

#### Tera Te Mi-Ni-Burabeti

I kakoaua ba a bon maiti Kiritian ni ikotaki ma kain te Charismatic aika a oota ao ata nanon te taeka ae Te Mi-NI-Burabeti. I kakoaua naba ba a bon maiti aekan kabaranakoan te taeka aei irouia. Ma e ngae ngke tera aia kabara-bara, a bon bane n te boto ni iango ao te reirei ae ti tebo. Ngai temanna ae I tuai ni kona ni kamatata nanon te taeka ae Te Mi-Ni-Burabeti kiaina ngkai I aki ataa raoi nanona. Ma ai rarabara Te Uea iroun ana Berebitero ae Te Tama Koru ba E a tia ni buokai ao n anganai teutana otau. Inanon moan te namakaina ae Tianuare 2010 ni karokoa nukan Maati 2010 ao e karaoaki kanga te runga n nebonebo irouia Parish aika Bikenibeu, Teoraereke, ao Betio. E moanaki mai Bikenibeu n te Tabati teuana, Teoraereke n te Tabati are imuina ni karokoa e buta te raun i Betio n te ka-teniua n Tabati. E koro uoua te raun tain te runga n te iwawaki n nebonebo aei ao bon raoraora n taai aikai Te Tama Koru. N tairikin te Tabati teuana i Teoraereke E teirake Te Tama n anga taeka n reirei tabeua. E taku iaon te Mi-Ni-Burabeti. "Te Mi-Ni-Burabeti bon te tamnei are ko nooria ke ko miakinna inanon tain te nebonebo. E na riai n tibaki ke n taekinaki te mii anne ao e a manga riki ba te taetae ni Burabeti." Aio ana taeka Te Tama Koru n aron au raverave ma tauan muina irou. Moan te kabaia nanou n ongora ana kabara-bara Te Tama iaon Te Mi-Ni-Burabeti ao I ataia raoi ngkai ba kaoti ke tamnei ake a nonoraki n tain te nebonebo a bon koaua ba bon taiani Mi-Ni-Burabeti.



Tariu ma maneu aika kam wareware n te tai aei ti bia kona n uringa te Mi-Ni-Burabeti imain ara

nebonebo ao ni butia Te Uea te karea aei. Ao ngkana ti kuba n anganaki n tain te nebonebo, ti bia kona n tibaia ba e aonga ni manga riki ba te taetae ni burabeti nakoia kain te botaki n nebonebo.



*“Te Mi-Ni-Burabeti  
bon te tamnei are ko  
nooria ke ko miakinna  
inanon tain te  
nebonebo.....”*



## Te Karaki

### Rinanon ana taratara Iesu

*Fulitua Taraora, St Teretia n Iesu Te Tei, NZ*

#### Iesu + + + 2-7-96

I taakin baiu ao I kangai " Ngkami aika iai kainnanomi, kam na kunea katokan kainnanomi Irou...ngkami aika kam maraki kamaiuaki rinanou...ngkami aika kam bua N na bon kaeta kawaimi. Bon Ngai te Ota ae e ruo nakon te aonaba ba N na tabeki nako rawawatami. Ngai te ota are e raneanea inanon te roo. Ngai te ota are I karuoaki iroun te Tama ni kaota te kawai."

A keerake ngkanne te koraki ake a roko ni kataia n ringai ao ni kaniai. Ma e takarua Betero n te bana ae korakora ao n tuangia ba a na tataninga ao ni kerake, temanna imuin temanna.

I katoka baiu iaioia ao ni bubutia te Tama ba e na kanakoa marakia. A noraba mataki, a ongo bonotaninga ao a nakonako mauku.

E kerake ngkanne temanna te tei ae e uarereke ao I noria ba e kororo rangana are teaina. E taua bain tinana ni kamatoa ao e kerake.

"Te Tia Reirei, taiaoka ringa natiu, taiaoka kamarurunga. E bon bungiaiki n arona aio ba tao kaboan muin au bure. Taiaoka te Tia Reirei, kamarurunga. Tuangai tera te bai ae ko tangiria mai iroun ao N na karaoia, ma taiaoka kamarurunga natiu ae akea ana bure."Ngke e tabe n taetae ao e a mangoa te tang ao natina e koono tinana ao ni manga ira tangina. "Tinau, tai tang. I tangiriko tinau, taiaoka tai tang." E taku te teinimane..

E uruaki nanou n nora aekan rawawatan nanon te tina aio ma ana tangira ae e korakora. N na kanga n aki kaeka ana bubuti, ana onnon?

"Natiu, nakomai," E tarai te teinimane ma te nanokokoraki ma i a manga weteia riki, "Nakomai."

E a kataia ni mananga ni kawarai ma te maku teutana ma I baraki n tabekiarake, I tabekia ao I rabatia, I kaboria ma tabana ni kaori rannimatana ao I wetea Te Tama, "Tamau, Ko a tia ni kana-koai ba N na karaoa Nanom, ma ngaia ae ngkai, N na kaota neboakim ao n Aram, ao N na kamarurunga te tei aio.

I karuo te teinimane nako aontano ao e a kamaiuaki man maukuna. A eti rangana ao e a nakonako.

A bane n takarua aomata n neboneboa te Atua, ao tinan te teinimane, e baraki ao e kaboria ma waeu. I baraki ni kateirakea ao I tuanga, " N te tai aio ao ko a ataa ana Tangira te Atua. Kaikawa

natim ba am angakarea nakon te Atua ibukin neboana."

E tabe ni korakora maitin te aomata ake a manga roko riki ao I noria au reirei ba e a taonia te kua n aiarou naba. I a tuanga ngkanne Betero, "Ti a riari nako." Ngke e tabe n iangoia ba ti na nakea ao e a takarua naba te bana ni kangai, "Au Uea, nakomai nakon au auti ni motirawa iai." I tarataranako ao I nora te unimane are e tararake ma moamoana are I kona n nora iai tamaroan tamneina, are e koburake mai iai ana tangira nakon te Atua. "Ko bati n raba ao ti rangi ni butimaea am kakao." Ao tia bane n iria.

Ngke ti roko n ana auti ao au reirei a bon taonaki n te kua ao te kanimatu ma te unimane, e bon katauaraoa te amarake ae e rangi ni kangkang n te aro are ti bane ni aki kona ni katibanakoa. N tain te amarake ao e taku nakoiria, "N te bong aio ao I a tia n nora bain te Atua ni karaoa ana Makuri. N te bong aio ao te Metia, E a tia n kakabaiaa ara kawa aio. Aio te bong ae I aki kona ni maninga.

E tan nakoina Iuta ao e kangai, "Au kantaninga ba a na bon aki kona ni maninga naba kain am kawa aio n angan te Tia Reirei kaniwangana ae e riari.."

"Iuta," I taku nakoina n te bana ae e korakora, " te kaniwanga ae e rangi n tau rokora n reitaki n amarake n te baka n amarake ae i matara ao ni butimaeaki nakon mwengan te aomata ae e rangi ni tamaroa. Kain te kawa aio, e rangi n tau te kaniwanga ae a anga are bon neboakin te Atua."

"Eng au Tia Reirei ma e bon rangi n uarereke ngkai maitin ara mane," e kaekai Iuta.

E kaeka Betero nakoina ni kangai, "Ngkana e taku ara te Tia Reirei ba e tau ae e reke iroura ao e a tau naba. Tai manga katabetabea riki."

E bainrang Iuta ao e tannako ma te un are I noria inanon matana. I tara nanona ao I nora te nano ao kiiriwe n te un ao te nano ni kan kabomui.

"Iuta ae I tatangiriko, tai katabea ami iango iai. Ko ataia ae ko rangi ni kakawaki nakoiu ao e rawawata nanou n noriko ba ko aki kukurei." E taraai ma te tangira ti teutana te tai ao e a manga bua ana iango ma n taku nakoiu, Eng te Tia Reirei, I ataia." E tannako ma te nano are e a irantangaia i bon irouna.

E tarai te unimane are e kaiuruaira ao e kangai, "Au Uea, n te bong aei ao tamneiu e a tia n namakina ana tangira te Atua. N na kanga ni maninga? N te tai aio ao I a kona ni butimaea te mate ngkana e roko ba I ataia ae e kantaningaai te kimareirei ikekei."

I taku nakoina, "Te kimareirei are i karawa, e a kaman tauraoi ikekei ibukim, ma e koaua ba ko a tia ni katonga karewena n te bong aio.. Maium, e

*."Ngke e tabe n taetae  
ao e a mangoa te tang  
ao natina e koono  
tinana ao ni manga ira  
tangina".*

a tia ni kaman noraki iroun Tamau, man te tai are ko bungiaiki iai. Am tangira ibukin te Atua, rinanon te kataaki ma te maraki, bon taian baintangira are a butimaeka mai karawa. E a tia Tamau ni kaman katauaraoa nnem n Ana tai-bora, are ti na bane n tekateka iai inanon te kimareirei n akea tokina. Te unimane, nanom bon ana bai te Atua ao kaniwangam, a mena iroun te Atua.

N te bong are imuina ngke ti tabe ni kitana te kawa, a roko tabeman aomata nakoiria ao a katukui mane ma amarake inanon baia au reirei ma n taku, "Tiaoka ma manga okirira n te ti ae e waekoa."

E bon rangi n taraa ni kaimareirei Iuta.

E kabuebue te bong ao e bubu te kawai.ma ngaia are ti a teketeka teutana te tai ni katoki kuara.

A kerake Mataio ma Ioane ao a kangai, "Ara Tia Reirei, ko riai n motirawa riki. E korakora ae ko makuria ao e uarereke am motirawa. Ngkana iai ae e kainnanoi ko ko a bon kawaria naba n aki tabeakina kainnanom. Ko bon riai ni motirawa ba muina ko na aoraki."

I kaekai ma n taku, "A kaman koreaki maitin au tai ao e warebong au tai. Ngkana I oki nakon Tamau, ao e na bon riki n te bong are e weteai iai ao n aron are e taku ao N na riai ni karaoa Nanona n ti ngai. Ni karokoa te tai anne ao N na karaoa ana makuri Tamau ni manga karekeia ana botanaomata ae e boou te Atua. N te kaawa ae imaira ao iai te auti ni motirawa. Rimoau ao karekea ara ruu iai ibukin tenibong ba I aonga ni motirawa iai n aron ae N na motirawa iai n te bong ae e na roko. Ao ngkanne imuin tenibong ao N na teirake ma te marurung ao te korakora, ni karaoa Nanon Tamau."

Te ruu n te auti ni motirawa arei e bon uarereke ma bon akea te karongoa iai ao e kamwengaraoi. I matu iai ma te rau inanon tenibong ao n te katenibong ao I uti ma namakinan ae I rangi ni kaan ma Tamau. I a ongo naba te rebwetau iaon au matarao, " Te Tia Reirei, ko a uti, kawaekoa nakomai irai."Bon Iakobo are e onrake n te mimi ao te rokonnano, are bon aroarona. Ngke i rimuina ao i nora te tautia n Roma are e ikoaki ba e ewaraki ao e teke buroona iroun temanna te tia kakaitara te tautaeka n Roma. A taku te koraki ba e nang mate.

"Te Tia Reirei, kamarurungnga, ba muina e roko te tanga n tautia ni kabomui," e takarua teuare ara auti te auti ni motirawa.

I tara te tautia ao I noria ae bon te kamanta te tanga, te aomata ae e taneiai ni babairei taekai ana tautia ao bon akea makakin te mate are i noria i matana, ma ti te tabeaianga ibukia ana utu ngkana e nang kitania. "Teuarei, N na bon

kamaiua, tiaki ibukin totokoan rokoia tautia ni kabomui, ma ibukin te tangira ae e mena inanon ibukia ana uti...ao N na uota naba nanona nakon te Atua."

I katoka baiu iaon ikoakina ao e in ma ni mao. E teirake ao e taku, "Ngkoe ae ko tabu, N na aki kona ni manuokiniko ao N na tataro nakoia atuau ba ana angniko te tokanikai."

I kaeka ma nanou n tangiria, "Akea riki te atua ba bon ti te Atua ao Ngai bon Natina are e kana-koai ibukin kainaomatakin te aonnaba mairouia atua ni kewe, bouananti ni kewe ao taian koaua aika a mamanaa te aba.

"I aki ota n am taeka, ngkoe ae ko tabu ma I namakina te raoi ngkana ko taetae ao ti te bo ba ko taekina te koaua. Antai te Atua anne?" E titiraki te tautia.

"Bon Tamau are i Karawa are E ti tangira te raoiroi ibukia aomata ni kabaneia, are E tangiria aomata ni kabaneia ao E weteia kain ana utu ni kabaneia. I roko ba N na kakoaua aron mimitongina, ana tangira ao makana ma ana nanonga."

E baka nako aon bubuan waena te tautia ao e tang "Au Uea, I ongo ao I kakoaua. Man te tai aio ao nanou I ti kan kakoaua ba Tamam bon atuau ao Ngkoe ba au Uea. Kariaia ba N na tiku ao n iririko. Kariaia ba N na buokiko."

"Raou," I kaeka, "e riai ba ko na okiria am utu ba a tataningaiko. Man te tai aio ao ni bai ni kabane aika ko karaoi ao kaota te tangira nakoia aomata ni kabaneia: tai kaikoaka temanna...ma ti anga te ibuobuoki. Karaoa te bong teuana ma teuana ba am anga karea ni katituaraoi nakon te Atua ao n te aro anne ao ko na bon irirai iai ao ni mananga iaon te kawai nakon te kimareirei ae akea tokina."

E nako ma te nano ae e onrake n te tangira, te kantaninga ao te kariaria. Man te bong anne ni karokoa te bong are e roko iai i karawa ao e karaoa nanon ana taeka ao e maiu n anga maiuna ti ibukin te Atua.

A mimi au reirei ao a taku, " Te Tia Reirei, teuarei te I-Roma ao te bekan, e aera ngkai ko taku ba e na roko i karawa?"

I taraiia ma koburaken au tangira ibukia ao I kangai, " Ngai te Ota ibukin te aonnaba: I kamaiuia aomata ake a kan kamaiuaki ni kabaneia, tao Iutaia ke bekan, ba te Tama e kariika aomata ni kabaneia ao e tangiriia aomata ni kabaneia, ao Ngai ae Natina, I tibaa naba te tangira anne."

*E na manga reitaki...*



*"E nako ma te nano ae  
e onrake n te tangira, te  
kantaninga ao te  
kariaria.."*



## Te Maeu ae Tabu

### Buokaia ara Berebitero n ara Tataro

Beneteta Raobati, St Padre Pio

Ti a manga kauringiia tarira ma manera ni kabane inanon ara charismatic ba ti a kakorakoraira riki n uringia ara Tama aika I-Kiribati ni kabane iaon Kiribati ao n te aonaba. Ti a uringia riki ake a kainnanao buokaia n ara tataro n te tai aio ao ake a taonaki n te rawawata n tia ni kitana nakoia ni Berebitero.

Ti a bane n uaia n reitira n taai nako ma tinara Nei Maria, riki inanon aia Ririki Berebitero nte Aonaba n aki toki n anaa ara tataro ibukia ba kaotan ara ibuobuoki nakoia ma ara katituaraoi nakon te Uea n taai nako ibukia ana Berebitero aika E a tia n anganiira.

Ti a tataro...

### Te Tataro ibukia Ara Berebitero

*Iesu, Ngkoe ae bon te Berebitero n aki toki, kawakinia am Berebitero ni kabane inanon Atinibanim ae moan te Tabu*

*ba a na katanaki iai man taian kabuanibai.*

*Kateimatoa itiakin baia ake a aki toki n taua Rabatam ae moan te Tabu.*

*Ao kateimatoa naba itiakin wiia ake a aki toki ni katonga Raraam ae moan te Tabu.*

*Kaitiaka ao karaneanea nanoia ake a tia ni katabuaki ibukin nakoia ni Berebitero.*

*Rabunia ao katania n am Tangira ae moan te Tabu mani kariiri nako i aonteaba.*

*Kakabaiaia ao kabatai uaan aia beku Ibukim ao*


*Ke e riki kamaeuan tamneia aomata ba kakukureiaia i aonteaba ao karekean kanu-angaia n aki toki i Rarikim i Karawa. Amen.*

Aio ngkanne te rongorongo teuana ibukin temanna te Berebitero. Kam kina ba antai?

Arana bon te Tama Maximilian Kolbe bon ngaia naba temanna mai ibuakoia ara Berebitero are e katabuaki nakon te Santo n 10 n Okitoba, 1982. Bon te Tama ngaia i abana are Poland. Ti a ongora ni karakinana:

Te Tama Maximilian Kolbe bon kaain te aba ae Poland are bon aban naba te Pope Ioane Bauro II ao neiere Santa Faustina are e anganaki te tataro are te 'Bau n Nanoanga' iroun ara Uea ao ara Tia Kamaeu ae Iesu Kristo.

E bon anga maeuna te Tama Maximilian ibukin temanna te mane are raona ni kabureaki irouia I-Tiaman n te karabuti ae



arana te'NAZI Concentration Camp' i bon i aon Poland.

N tain te kauoua ni buaka n te aonaaba ao e bati ana ibuobuoki te Tama Maximilian nakoia uake a aki toki ni kakaea katanaia mai irouia tautian Tiaman. Angina ake e buokiia bon kaain Poland. Bon iai naba tenaan Iutaia.

Ibukin ana ibuobuoki aei ao n tokina n te namakaina ae Beberuare 17 n te ririki 1941 ao e a tauaki man kabureaki irouia bureitimanin te NAZI. E karinaki n te matawariki n te kaawa teuana i aon Poland. Teniua te namakiana imwina ao e a manga kanakoaki nakon te tabo ae Auschwitz bon iaon naba Poland.

N Turai ao akea ba e bua temanna kaain ana karabuuti te Tama Kolbe are e bon kanamakinaki ba e reke birinakona ma e a manga bon kuneaki tabebong imwiina ba e ni b'ab'a. Ngke e a ataaki iroun te mataniwi ni kamwanta ao e tua ba a na anaaki tengaun mai buakoia buure ake a tiku ba a na kaokoroaki man aki kakamwarakeaki ni karo-koa ae a mate ba tuaia ngkai e reke te kabuanibwai nakon raomia.

Ibuakoia naaka tengaun aikai bon te mane ae arana Franciszek Gajowniczek. Ngke e rineaki teuaei ao ea mangooa te tang mani bubuti nakoia tautia ba a na aki anaia ba a kaawa buna ma natina ake a tiku n tataningaia. Ngke e ongo te Tama Maximilian ao e a anga nanona ba e na onea muin teuaei.

Inanon ana tai n tiku n aki kakamarakeaki te Tama Maximilian ao e kairiia raona ake ruaman n tataro man anenea neboan te Uea. Imwiin teniua te wiki n akea te amarake ma te mooi ao a mate ake onoman ao e tiku te Tama Maximilian ma raona riki ake teniman. E bon kaungaia raona te Tama man tuangiia ae a bon aki aua ni kaitibo ma Tinaia Nei Maria i karawa. Ni katoa tai ae a ririaki iai tautia a bon aki toki n noora te Tama n tei ke ni katorobubua ao a bon titiraki inanoia ba e mamatu ke e aki!!

Ngke a kuneaki rimwi ao a bane ni mate raona ake teniman ao ngaia e aki ai ngaia are a itinna naba n te iti ae kanoana te 'carbolic acid'. Ai kawara. Ara tataro ao ara ubuti nakon Santo Maximilian Kolbe ba e bia bubuti ibukira ba ti na anganaki te nano n tangira ae moan te bati ibukiia raora. E raba te Uea.

E kinaki ba te aomata ae Tabu te Tama Maxmillian n 17 Okitoba, 1971 ao e karikaki ba te Santo iroun Bobe Ioane Bauro II n 10 Okitoba, 1982. Temanna ibuakoia ake a roko n tutia ni kamatoa ibukin Santo Maximilian bon teuae e kamaeua ngkoa n te karabuti ao are e bon reke naba ana tai ni karaba ao ni karakina aron kamaeua iroun te Tama ae St Maximilian Kolbe.

*“Ti a uringia riki ake a kainnanao buokaia n ara tataro n te tai aio ao ake a taonaki n te rawawata n tia ni kitana nakoia ni Berebitero”*